

Asisko gutuna

2009ko azaroa. 1.go printzipioa: Egutero, Jainkoarekin

harreman pertsonalean jartzen saiatu 13. zenbakia

Asis Sarea eguneroko bizimoduan espiritualtasun frantziskotarra ezagutu edo partekatu nahi duten lagunen sare sozial irekia da.

Asis Sarearen lehen printzipiora gatoz gaur berriro. Bertan, sinestunei ez ezik, beren burua halakotzat ez edukiz bilaketan eta irekiak dabiltzanei ere gonbitea egiten zaie barne bizitza lantzerako, beren bizitzaren norabidea aurkitzeko bide gisa. Pertsonaren barne

eta baitatik, aurki ahalko dira erantzun-bideak barnean kolpeka ari diren galderei, bizitza mugiarazten duten bilaketei. Eguneroko bizitzan isiltasunari, gogoetari eta ebanjelioa irakurtzeari... momentuak emateak lagun dezake pausoak ematen.

Gogoetarako gaia

Jainkoa aurkitze bidean

Zalantza eta beldurrez beteriko gizartean bizi gara. Egia handirik ez dagoela dirudien munduan eta egia ziurak desagertu direnekoan, beldurra bihurtzen da sarriro bizitzaren ardatz.

Eta hor gabiltza guztiok erreferentzia-puntu bila, norabidea aurkitzeko. Gure bilaketan, horrela, galdera gisa agertzen da Jainkoa. Hurbil gaitezke pixkanaka haren hitzera; Ebanjelioan Jesusek dio: "bila ezazue eta aurkituko duzue". Hitz horietan apur bat sinetsiz, has gaitezke bidea egiten. Fede txiki horrek, bizia sumatzen dugun hitzean eta bidea irekitzen digutenean fedean oinarriturik, egia ziur bihurtzen du Jainkoa arian-arian.

Jainkoak Jesusen giza figura hartzen du, eta gure ondoan bide egiten hasten da, gure beldurra konfiantza apal bihurtuz. Baina gutxi ulertzen dugu; Jainkoari tokia utziz goaz, Ebanjeliotik asko ulertu gabe, korapilatsua iruditzen zaigun Misterioaz harriduraz beterik. Konfiantza apal horrek bide ematen digu geure fede txikian soilik ez oinarritzeko; bide ematen digu besteen fedean oinarritzeko: ulertzen ez dudana besteek ulertzen dute nire ordean, eta neure bideko sasia kentzen laguntzen didate.

Jainkoa, horrela, guregandik zer nahi duen agertuz doakigu. Gutako bakoitza bere bidetik ibiltzera deitzen gaitu Jainkoak, eta behin eta berriro itzultzen gara bide horretara geure bizitzan zehar.

Ebanjelioko pasartea: Jn 1, 35-39

Hurrengo egunean, berriro ere bertan zegoen Joan bere bi ikasleekin. Jesus handik igarotzen ikusirik, esan zuen: «Hona hemen Jainkoaren Bildotsa». Jainkoaren Bildotsa. Bi ikasleek, hori entzutean, Jesusi jarraitu zioten. Jesusek, atzera begiratu eta ondoren

zetoziola ikusirik, galdetu zien: Zeren bila zabilzate? Haiek erantzun: Rabbi, non bizi zara? (Rabbik «Maisu» esan nahi du). Jesusek esan zien: Etorri eta ikusi. Joan, non bizi zen ikusi eta berarekin gelditu ziren egun hartan. Arratsaldeko laurak aldea zen.

Espiritualtasun frantziskotarra

Gudu-espedizio batean bidegile, Frantziskok bere etorkizuna erabat markatuko duen esperientzia izan zuen. Ahots batek esaten dio ametsetan: "Frantzisko, nork ekar diezazuke onura handiagoa, jaunak ala morroiak? Frantziskok "Jaunak" erantzun zuenean ahotsak esan zion: Zergatik zabilta, bada, morroiaren bila jaunaren orde?". Existenziari buruzko galdera sortzen zaio Frantziskori. Intuizio baten arrastoa hasten da agertzen: absolutu batek soilik merezi du ahalegina bizitzan. Hasieran intuizioak ez dira oso argi eta garbiak, ez dute zehaztasun handirik; Frantziskok ez daki zer nahi duen, baina bere baitan aldatzen ari da bizitza ikusteko modua; gauzak erlatibizatzen hasten da, bizimodua aldatzen; benetan inportantea dena bereizi eta aukeratu beharra jartzen zaio aurrean, eta horrela bilaketa espiritual baten prozesu pertsonalean sartzen da.

41. Salmotik

Basahuntza irrikaz
errekara bezala,
halaxe ni zuregana, ene Jainko.

Jainkoaren egarri naiz,
Bizitzaren Jainkoaren egarri:
noiz iritsiko ni Jainkoaren aurpegia ikustera?

Gau eta egun
malkoak ditut janari,

jendea uneoro galdezka ari zaidala:
«Non duk Jainkoa?»

Hauxe esango diot:
«Ene haitz, zergatik ahaztu nauzu?

Zergatik behar dut goibel ibili?»
Zergatik hain urduri?

Jainkoarengan espero dut!
Bera da nire Jainkoa eta Salbatzailea!

Gutuneko azken hitzak

Konfiantzak askatu egiten nau mugatua izatearen larritik, existentzia mendean hartzeko ilusioaz babesten den mugatasunarenetik.

2009ko abenduko eguneroko ebanjelioa

Egunero Ebanjelioa irakurri nahi duten lagunek, egun bakoitzari dagozkion irakurgaien arabera, hemen dauzkate abenduko erreferentzia guztiak:

1 Lk 10,21-24	8 Lk 1,26-38	15 Mt 21,28-32	22 Lk 1,46-56	29 Lk 2,22-35
2 Mt 15,29-37	9 Mt 11,28-30	16 Lk 7,19-23	23 Lk 1,57-66	30 Lk 2,36-40
3 Mt 7,21.24-27	10 Mt 11,11-15	17 Mt 1,1-17	24 Lk 1,67-79	31 Jn 1,1-18
4 Mt 9,27-31	11 Mt 11,16-19	18 Mt 1,18-24	25 Jn 1,1-18	
5 Mt 9,35-10,1.6-8	12 Lk 1,39-45	19 Lk 1,5-25	26 Mt 10,17-22	
6 Lk 3, 1-6	13 Lk 3, 10-18	20 Lk 1, 39-45	27 Lk 2, 41-52	
7 Lk 5,17-26	14 Mt 21,23-27	21 Lk 1,39-45	28 Mt 2,13-18	

Oharrak:

Asis Sarearen ezaugarri nagusia da irekia izan nahi duela eta bere asmoa biderkatzea. Irekitasun hau sarean parte hartzen dugun bakoitzari egitea dagokigu. Guztiok biderka dezakegu Asis Sarea, hileroko Gutun hau jasotzera edo hileroko azken ostegunetan 19.30ean, ohiko lekuetan, ospatzen dugun otoitzaldian parte hartzera nor gonbida dezakegun pentsatuz.

Asis Sareari buruzko informazioa hartu nahi izanez gero, edo gutun hau hileroko hartzeko izen emateko, deitu 646-214896 telefono zenbakira edo bidali mezua asissarea@arantzazu.org helbide elektronikora.

Asisko Gutunaz, bakarka nahiz taldean lan egiteko iradokizunak

Asisko gutuna

2009ko azaroa. 1. go printzipioa. Egutero, Jainkoarekiko

harreman pertsonala landu

13. zenbakia

Bila ibiltzea planteatzen zaigu azaroko Asisko Gutunean. Pentsa daiteke bilaketa hori beren burua sinesteduntzat ez daukatenei bakarrik zuzentzen zaiela, baina denok dakigu zein erraza den urrutiratzea, eta zenbat aldiz behar dugun bilaketan hasi edo jarraitu.

Jainkoaren bila

Zeintzuk dira zeure bizitzari nondik norakoa ematen dioten errealitateak? Pentsa ezazu benetan ematen dioten horietan, ez ematea gustatuko litzaizukeenetan. Sentitzen duzu bila jarraitzearen premia?

Zein toki du Jainkoak, tokirik baldin badu, zeure nondik norakoaren bilaketan? Ibiltzen hasteko ez da behar, dagoeneko, "mendiak tokiz aldatzeko moduko federik".

Jainkoak, zuk zeuk baino gogo gehiago dauka, biok elkar aurki dezazuen: sinesten duzu hori?

"Zatozte eta ikus"

Badago zeure bizitzan norbait, Joanek bezala Jesus seinalatu dizunik? Agian nahikoa duzu lehen pausoa emateko.

Dena den, ez dago errezeta magikorik fedearen bidean sartzeko nahiz aurrera egiteko; azkenean erabakia hartu, arriskatu, egin behar da, eta hori zuk bakarrik egin dezakezu...

Entzun iezaiozu Jesusi zeuri galdezka: "zeren bila zabilta?" Erantzun iezaiozu, mintza zakizkio zeure desira sakonenez... Gutxienik, fidatzen zara Jesusekin, *non bizi den ikustera joateko lain?*

Nork ekar diezazuke onura handiagoa, jaunak ala morroiak?

Zerk eraman zintuen bilaketa pertsonalean hastera? Ona da bilaketa hori abian jarri zuten motibazioetara itzultzea; eman diezaiokete sendotasuna edo bultzada, adorerik gabeko edo zailtasuneko momentuetan.

Zeure bizitzan, zeintzuk dituzu zeure *zerbitzari* edo *morroi* maiteenak, zeure bizitzari eragiten diotenak? Sumatzen duzu

nondik joan zaitezkeen zeure bizitzako "jauna" aurkituz?

Inoiz jarri zara pentsatzen, zer den zeure bizitzan benetan garrantzitsua?

Erraz joaten dira urteak, geure bizitzari aurrez aurre begiratzeari, eta bilaketa-prozesua hasteari, ihes eginez. Hori da gertatzen zaizuna? Har ezazu kontuan, horrek berdin balio duela beren burua fededuntzat daukatentzat, beren fedea ideologia, sinesten diren gauzak, baino gehiago ozta-ozta denean.

"Ni zuregana, ene Jainko"

Har ezazu une bat, presarik gabe, salmo hau irakurtzeko. Zein sentimendu esnatzen ditu zure baitan?

Zein da zure *egarria* zeure asegabetasun, desilusio eta porroten azpian? Zeren *egarri* zara? Onartuko al zenuke honako hipotesi hau: guzti horren azpian egon daitekeela zugan *Jainkoaren egarria*?

Esan berriz salmoa, geldiro, zeuk idatzi bazenu bezala. Zer gertatzen da zeure baitan?

Iradozikun praktikoa: isiltasuna egin zeure baitan

Gogoeta egiteko, errezatzeko nahiz besterik gabe bizitzeko, garrantzitsua da geure barnea isilarazi ahal izatea, betetzen duten eta geuregandik banantzen gaituzten zarata guztietatik.

Eser zaitez eroso, baina atentzioa esna edukitzeko moduan. Zoaz zeure arnasaren kontzientzia hartuz, nola duzun arnasa hartzen eta nola botatzen, behin eta berriz.

Jarrai zeure arnasa, behartu gabe, jarraitu soilik, ezertan pentsatu gabe, zeure atentzioa besterik gabe arnasari lotuz.

Zaude horrela minutu batzuetan eta egiaztatu, nola aurkitzen zaren gero eta isilduagoa, barneratuagoa, beraz zeure alderik onenera irekiagoa.